

হারায়ে পাই ফিরে ফিরে,
দেখা আমার তোমার সাথে
নূতন করে নূতন প্রাতে ॥

(৩)

ঐ অমল হাতে রজনী প্রাতে
আপনি জ্বালো

এই ত আলো—

এই ত আলো ।

এই ত প্রভাত, এই ত আকাশ,

এই ত পূজার পুষ্প বিকাশ,

এই ত বিমল, এই ত মধুর,

এই ত ভালো—

এই ত আলো—

এই ত আলো ।

অঁধার মেঘের বন্ধে জেগে

আপনি জ্বালো

এই ত আলো—

এই ত আলো ।

এই ত বাঙ্গা তড়িৎ-জ্বালা,

এই ত ছুঃখের অগ্নিমালা,

এই ত মুক্তি, এই দীপ্তি,

এই ত ভালো—

এই ত আলো—

এই ত আলো ।

(৪)

এত আলো জ্বালিয়েছ এই গগনে

কি উৎসবের লগনে ?

সব আলোটি কেমন করে

ফেল আমার মুখের পরে

আপনি থাক আলোর পিছনে ॥

প্রেমটি যে দিন জ্বালি হৃদয়-গগনে

কি উৎসবের লগনে—

সব আলো তার কেমন করে

পড়ে তোমার মুখের পরে

আপনি পড়ি আলোর পিছনে ।

(৫)

না বাঁচাবে আমায় যদি

মারবে কেন তবে ?

কিসের তরে এই আয়োজন

এমন কলরবে ?

অগ্নিবাণে তুণ যে ভরা,

চরণ ভরে কাঁপে ধরা,

জীবনদাতা মেতেছ যে

মরণ মহোৎসবে ।

বন্ধ আমার এমন করে'

বিদীর্ণ যে কর

উৎস যদি না বাহিরায়

হবে কেমনতর ?

এই যে আমার ব্যথার খনি

জোগাবে ঐ মুকুট মণি,

মরণ-ছুখে জাগাব মোর

জীবন বলভে ॥

(৬)

সহজ হবি, সহজ হবি,

ওরে মন, সহজ হবি ।

কাছের জিনিস দূরে রাখো

তার থেকে তুই দূরে রবি ।

কেন রে তোর ছুঁহাত পাতা,

দান ত না চাই, চাই যে দাতা,

সহজে তুই দিবি যখন

সহজে তুই সকল লবি ।

সহজ হবি, সহজ হবি

ওরে মন সহজ হবি

আপন বচন-রচন হতে

বাহির হয়ে আয়রে কবি ।

সকল কথার বাহিরেতে

ভুবন আছে হৃদয় পেতে,

নীরব ফুলের নয়ন-পানে

চেয়ে আছে নীরব-রবি ॥